

Erich Bolinius

E-Mail: Erich.Bolinus@t-online.de

**(Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 26.1.2012 18.05 Uhr auf 94.0 bzw. 87,7)**

Moin, leev Toehörers,

’n Spölbericht van Kickers Emden kann ik immer noch neet geven. Nu was ik ok 14 Daag neet in Emden, sünnern mit mien Frau in de Karibik. Dor hebb ik neet völ mitkregen, wo dat upstünns bi Kickers Emden löppt. Natürelk hebb ik güstern, as ik d’ weer was, ok de Sportsieden van de oostfreeske Bladen overflogen, um wat over Kickers Emden toe erfahren.

Heel völ Neeis kunn ik dor aber ok neet lesen. De Insolvenzverwalter will wall eerst an 31.1.2012 sien Befinnen (Gutachten) vörlegen. Dat is leep skaa, dat dat so lang dürt hett, meen ik. Dat sleit sük ok up de Wesseleei van de Spölers daal. Wenn een Spöler sük för Kickers Emden enskeddt hett in de Oberliga de Restsaison toe spölen, dann kann dat wesen, dat he dat gaar neet kann, wall dat Befinnen van de Insolvenzverwalter so slecht is, dat Kickers Emden ’n neei Anfang in de Kreisliga maken mutt.

Man dat wölen wi ja aber all neet hopen. Ik bün in disse Saak Optimist un löv, dat de Spölbedriev in de Oberliga wieder gahn kann. Man dortoe bruukt man Spölers. So as ik Karsten Golnik bither verstahn hebb, is ok he optimistisch, dat he Spölers för ’n Mannskupp toesaamen kriggt.

Dat in Dezember 2011 utfallende Spöl tegen Osterholz-Scharmbeck sall an 4. Februar um Klock 8 in dat Oostfreesland-Stadion in Emden anfleit worden. Ik hebb versöcht, up de homepage van Kickers Emden dorover wat toe finnen. Fleitjepiepen! De Sied word anskienend gaar neet mehr bearbeidt. Anners sücht dat in de Kickers-Fan-Forum ut. Dor doent de Fans ’n Bült rinschrievn. Neet all, wat dor steiht, is ok goed. Man dat meeste hett doch Hand un Foet!

Ja, de Fans maken sük Sorgen, wo dat mit hörs Vereen wieder geiht. Na de 31. Januar sall wall de neei Vörstand ok de Fans over de Stand informieren. Dat is ok unbedingt nödig! Ohn Fans kann een Vereen up de Dürde neet existeren.

Natürelk hoop ik, dat de goed Jögdarbeit (Jugendarbeit) bi Kickers Emden wieder geiht, egaal wat mit de Vereen ok passert. Mit de A-Jögdmannskupp hett man ja all, so as ik Karsten Golnik verstahn hett, all proot. Un dat is goed. De Jungs mutten weten, dat se up keen Fall in d’ Regen stahn.

In mien Urlaub kunn ik blot in ’t Fernsehen de Dütske Welle (Deutsche Welle) kriegen. De hemmen dor ’n lang Bericht over de Jögdarbeit van Hertha Zehlendorf un mit hörs Partner, de VFL Wolfsburg, brocht. Un dorbi kwamm ok de Emder Bernhard Janssen, de Jögdtrainer van VFL Wolfsburg un ehemalige Trainer van Kickers Emden, toe Woord. Junge, wat de dor mit de Jögdspölers upstellen, dat is allerbest. Villicht sulltesten sük de Verantwortlichen van Kickers Emden maal mit Bernhard Janssen in Verbinden setten. Villicht kann he Kickers helpen. Wenn ’n Kooperation mit Hertha Zehlendorp mögelk is, kunn dat doch mit Kickers Emden, un Emden ist ja ok noch ’n VW-Stadt, klappen. Bün gespannt, of een van de Vörstand up disse Vörslag ingeiht.

Ja, leev Toehörers un Kickers-Emden-Fans wat blifft uns over, as de Dumen toe drücken, dat dat doch noch ’n goed Enn mit Kickers Emden nimmt. Emden un Oostfreesland bruukt ’n hoog spölende Mannskupp. Un ’n anner Vereen as Kickers is för mi upstünns neet in Sicht.

So, as alltied, toe Schluss noch ’n kört Foetballwitz:

„Papa, wat word ’n Foetballstar wenn he neet mehr goed sehn kann?“, fraggt Heinz sien Vader. „Dann word he Schiedsrichter“, knurrt sien Vader.

So leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.